



Broj:

Sarajevo, 14.2.2020. godine

Bosna i Hercegovina

Parlamentarna skupština Bosne i Hercegovine

Dom naroda

n/r predsjedavajućeg Dragana Čovića

Na osnovu člana 9. Poslovnika Doma naroda Parlamentarne skupštine BiH („Službeni glasnik BiH“ br. 58/14, 88/15, 96/15, 53/16) podnosim delegatsku

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 14-02-2020 848

Organizaciona jedinica	Klasifikaciona oznaka	Redni broj	Broj priloga
02	50-6	430	120

INICIJATIVU

kojom se zadužuje Vijeće ministara BiH da, najkasnije u roku od šest mjeseci od dana usvajanja ove inicijative u Domu naroda Parlamentarne skupštine BiH, pripremi i u parlamentarnu proceduru dostavi **amandman kojim se mijenja član VI. stav 1. Ustava BiH na način da Ustavni sud BiH ima dvanaest članova, od kojih predsjednik Evropskog suda za ljudska prava, nakon konsultacija sa Predsjedništvom BiH, bira šest članova Ustavnog suda BiH.**

OBRASLOŽENJE:

U skladu sa Ustavom BiH Ustavni sud BiH nosi poseban teret odgovornosti da u posljednjoj instanci odlučuje o najvažnijim ustavnopravnim pitanjima u državi Bosni i Hercegovini. To zahtijeva da sudije ovog suda, kao najviše pozicionirani u sudskoj hijerarhiji, posjeduju stručnu perfekciju, odmjerenost, dalekovidnost i sudsku suzdržanost. Ustavni sud BiH mora imati potpunu nezavisnost od etno-političkog uticaja. Nažalost, neodgovorni i separatistički orijentirani političari u državi Bosni i Hercegovini pokrenuli su agresivnu kampanju s ciljem da ovaj državni sudski organ stave pod političku kontrolu. Takvoj antievropskoj i antidemokratskoj politici u trenutnim okolnostima najefikasnije se može suprotstaviti

angažiranjem još trojice sudija koje će iz reda međunarodno priznatih eksperata za ustavno pravo predložiti predsjednik Evropskog suda za ljudska prava nakon konsultacija sa Predsjedništvom BiH.

Ustavni sud BiH je u prethodnom periodu dokazao da je jedna od rijetkih institucija koja ima snage da donosi veoma teške i bitne odluke za našu državu na profesionalan, pravičan i nepristrasan način. Zato je nužno dodatno ojačati ovu državnu instituciju i ne dozvoliti da destruktivni političari blokiraju njen rad. Ustavni sud BiH je pokazao da hoće, može i zna raditi u skladu sa „evropskim standardima“ i to je činjenica koja je prepoznata širom Evrope i svijeta. Upravo zbog toga potrebno je pomoći Ustavnom sudu BiH da još snažnije nastavi raditi na uvođenju „evropskih standarda“ u našu državu.

U tumačenju, razradi i preciziranju ustavnih rješenja sadržanih u Ustavu BiH u velikoj mjeri je učestvovala međunarodna zajednica. Ustav BiH je specifičan ne samo zbog snažnog internacionalnog učešća nego i zbog činjenice da je Bosni i Hercegovini nametnut nefunkcionalan ustavnopravni sistem. Zato je u vezi s nadležnostima na državnom nivou neophodan sistematičniji pristup koji će moći osigurati neophodna ovlaštenja na državom nivou, kao što je to slučaj u bilo kojoj savremenoj demokratskoj državi. Sa postojećim aranžmanima i separatističkim snagama, koje otvoreno ugrožavaju Dejtonski mirovni proces i prijete destabilizaciji Bosne i Hercegovine i regiona, država Bosna i Hercegovina nije u stanju da efikasno učestvuje u procesu evroatlantskih integracija. Zbog toga, kao i niza drugih opravdanih razloga, Bosna i Hercegovina treba dodatnu konkretnu pomoć i u Ustavnom sudu BiH.

Dosadašnja primjena Dejtonskog mirovnog sporazuma nije ukinula opasnost od separatističkih tendencija, što može dovesti do rušenju mira i ustavnog poretka Bosne i Hercegovine. Međunarodna zajednica ima kapacitet i ovlasti da državi Bosni i Hercegovini pomogne da uspostavi nužne državne strukture koje su neophodne za ispunjavanje uslova za njeno članstvo u EU i NATO-u. Neshvatljivo je da ona nije u Bosni i Hercegovini uspostavila elementarne norme i standarde kakvi vladaju i u drugim evropskim demokratskim državama. Između ostalog, i to je razlog zašto bosanskohercegovačka država kasni u procesu evroatlantskih integracija.

Također, ne smijemo zaboraviti da međunarodna zajednica, osim međunarodnih pravnih obaveza, ima i ogromne moralne obaveze prema državi Bosni i Hercegovini: ako je Bosna i Hercegovina tokom agresije neopravdano ostavljena da se sama brani, ona danas ima pravo da od nje zahtijeva pomoć u nalaženju svog puta obnove i svoga mjesta među demokratskim državama ujedinjene Evrope. To znači da stvori pretpostavke za jačanje demokratskog i pravnog poretka i osnova civilnog društva.


Bosna i Hercegovina ima puno pravo tražiti od međunarodne zajednice da joj pomogne da svoje potencijalne i realne mogućnosti pretvori u šansu za izgradnju bolje budućnosti.

Država Bosna i Hercegovina kao potpisnica Dejtonskog mirovog sporazuma ne smije dozvoliti da ostane bez stranih sudija u Ustavnom sudu BiH, dok se Ustav BiH u svim svojim elementima ne usaglasi sa međunarodnim pravom i dok država Bosna i Hercegovina ne ispuni uslove za prijem u EU i NATO. Međunarodna zajednica treba pomoći državi Bosni i Hercegovini da postane funkcionalna država, da kao međunarodnopravni subjekt može da preuzme u punom kapacitetu sve svoje odgovornosti pred međunarodnom zajednicom koje ima svaka nezavisna i suverena država.

Nakon dvadeset i pet godina od potpisivanja Dejtonskog mirovnog sporazuma nužno je da međunarodna zajednica u Bosni i Hercegovini u primjeni ovog sporazuma u praksi pređe sa terena politike na teren prava. Dok Ustav BiH ne bude usaglašen u svim svojim elementima sa međunarodnim pravom, kao i dok u državi Bosni i Hercegovini djeluju separatisti i ekstremisti koji ugrožavaju mirovni proces, međunarodna zajednica treba snažno podržati odbranu mira i pravnog poretka u Bosni i Hercegovini.

S poštovanjem,

Delegat u Domu naroda PS BiH



Prof. dr. Denis Bećirović